

ZAPISNIK
SA TREĆE SJEDNICE VIJEĆA RODITELJA JU TREĆE GIMNAZIJE
U ŠKOLSKOJ 2021/22. GODINI

Treća sjednica Vijeća roditelja održana je u utorak, 22.02.2022. godine, s početkom u 18.00 sati u amfiteatru Škole. Sjednica je održana uz poštivanje svih propisanih zdravstveno-epidemioloških mjera.

Na početku sjednice konstatovano je da sjednici prisustvuje 17 članova Vijeća roditelja, te da su predstavnici IV-1 i IV-2 najavili odsustvo sa sjednice.

Nakon početka sjednice, istoj su se pridružili i predstavnici II-3, II-4 i IV3, tako da je ukupan broj prisutnih članova na Trećoj sjednici Vijeća roditelja bio 20 od 24. Na sjednici nisu prisustvovali predstavnici III-2 i IV-5 razreda.

Predsjednica Vijeća roditelja konstatovala je da je zadovoljen kvorum za odlučivanje.

Sjednici su pored predstavnika roditelja prisustvovala v.d. direktorice Škole, gđa Amra Čolić i pedagog Škole, gđa Hasija Dedović, a do tačke 7. Dnevnog reda i predsjednica i sekretar Vijeća učenika.

Predsjednica Vijeća roditelja je istakla da je uz poziv za Treću sjednicu Vijeća roditelja, predložila Dnevni red na koji nije bilo prijedloga za dopunu, te je isti jednoglasno usvojen:

Dnevni red

1. Upoznavanje Vijeća roditelja sa promjenom rukovodstva JU Treća gimnazija
2. Usvajanje Zapisnika sa Druge redovne sjednice Vijeća roditelja JU Treća gimnazija, održane 23.11.2021. godine
3. Usvajanje Zapisnika sa Vanredne (izborne) sjednice Vijeća roditelja Treća gimnazija održane 23.11.2021. godine
4. Analiza uspjeha u učenju i vladanju na kraju I polugodišta
5. Izvještaj o realizaciji nastavnih i vannastavnih aktivnosti u okviru prevencije nepoželjnih oblika ponašanja i vršnjačkog nasilja u I polugodištu
6. Upoznavanje sa aktivnostima Vijeća učenika JU Treća gimnazija
7. Izvještaj o održanim Decembarskim danima kulture
8. Upoznavanje roditelja sa ovogodišnjom manifestacijom Dani otvorenih vrata i školskim projektom „Naših ruku djela“
9. Informacija o realizaciji ekskurzije u školskoj 2021/2022. godini prema Instrukciji Ministarstva za odgoj i obrazovanje Kantona Sarajevo
10. Upoznavanje sa aktivnostima Koordinacije Novo Sarajevo VROSS Kantona Sarajevo
11. Prijedlog mjera za unapređenje radne klime u Školi i kreiranje prijatnog školskog ambijenta
12. Tekuća pitanja / Razno

Ad/1

U okviru ove tačke dnevnog reda v.d. direktorica Škole gđa Amra Čolić upoznala je članove Vijeća roditelja sa promjenama u rukovodstvu JU Treća gimnazija. Obzirom da je direktorica gđa Senada Salihović dobila posao u drugoj instituciji, gđa Čolić je informisala prisutne da je

u toku konkursna procedura za izbor direktora, te da se nada uspješnoj saradnji novog rukovodstva Škole sa Vijećem roditelja i u narednom periodu.

Gđa Alzira Hota je predložila, a što su podržali i svi članovi Vijeća roditelja, da Vijeće roditelja gdi Salihović uputi pismo sa izrazima zahvalnosti na dosadašnjoj saradnji i podršci.

Ad/2

Zapisnik sa Druge redovne sjednice Vijeća roditelja JU Treća gimnazija usvojen je jednoglasno sa 20 glasova.

Ad/3

Predsjednica gđa Brkić je informisala da je Zapisnik sa Vanredne (izborne) sjednice, održane 23.11.2021. godine, sačinjen na propisanom obrascu u skladu sa Pravilnikom Ministarstva, potpisan od strane komisije, zapisničara i ovjerivača zapisnika, te dostavljen prema definisanoj proceduri nadležnim institucijama odmah nakon održane sjednice. Ujedno je sačinjen dodatni detaljan Zapisnik sa Vanredne (izborne) sjednice i u formi prijedloga prethodno dostavljen u okviru ove tačke. Prijedlog detaljnog Zapisnika sa Vanredne (izborne) sjednice usvojen jednoglasno sa 20 glasova.

Ad/4

Članovi Vijeća roditelja upoznati su sa uspjehom u učenju i vladanju na kraju prvog polugodišta kroz Analizu uspjeha u učenju i vladanju na kraju I polugodišta, koja je dostavljena uz poziv za sjednicu. Podpredsjednik Vijeća roditelja gđin Obućina je sugerisao da bi se djeca koja nemaju izostanke na neki način trebala stimulirati. Pedagogica Škole gđa Dedović je istakla da svakako treba podstaći djecu za postizanje boljih rezultata i da se u dosadašnjoj praksi djeca sa odličnim uspjehom bez izostanaka pohvale na kraju prvog polugodišta, a na kraju godine im se dodijele i pismene pohvale.

Ad/5

U okviru ove tačke članovi Vijeća roditelja upoznati su sa realizovanim nastavnim i vannastavnim aktivnostima u okviru prevencije nepoželjnih oblika ponašanja i vršnjačkog nasilja u I polugodištu kroz Izvještaj koji je dostavljen uz poziv za sjednicu.

Ad/6

Predsjednica i sekretar Vijeća učenika, koji su na poziv Vijeća učenika prisustvovali dijelu sjednice, upoznali su predstavnike Vijeća roditelja sa brojnim aktivnostima i projektima koje je Vijeće učenika realizovalo u proteklom periodu: „Razmijeni korišten udžbenik“, „Slatkiši svima“, „Decembarski dani kulture“, Kupovina majica u saradnji sa učenicima Druge gimnazije i učešće u prikupljanju sredstava i doniranje istih, „Jedan slatkiš - jedno dijete“, paketići za djecu, doniranje odjeće udruženju Pomozi.ba, aktivnosti na Dan zaljubljenih, Dani ružičastih majica i dr.

Obzirom na mnogobrojne aktivnosti Vijeća učenika, te njihov volonterski rad na mnogobrojnim projektima, roditelji su pohvalili njihov angažman. Predsjednica Vijeća roditelja je predložila da se ubuduće odvija redovna komunikacija rukovodstva Vijeća roditelja sa rukovodstvom Vijeća učenika u cilju aktivne saradnje ovih vijeća, te većeg doprinosa roditelja aktivnostima Vijeća učenika.

Ad/7

Pedagog Škole gđa Dedović informisala je roditelje o Decembarskim danima kulture koji su održani 02. i 03.12.2021. godine. Ove godine su Decembarski dani kulture održani uz učešće manjeg broja odjeljenja i bez prisustva publike zbog pogoršane epidemiološke situacije. Gđa Dedović je istakla da su učenici u okviru ove aktivnosti, kao i prethodnih godina, pokazali kreativnost u pripremi i izvedbi kratkih predstava na ovoj manifestaciji.

Pobjedničkim odjeljenjima (I-6, II-5, III-6 i IV-5) uručene su nagrade od po 200 KM koje su obezbijedene iz participacije u školarini, te im dodijeljen i jedan slobodan dan.

Ad/8

V.d. direktorice Škole gđa Amra Čolić je upoznala roditelje sa manifestacijom Dani otvorenih vrata i projektom „Naših ruku djela“, za koje je planirano da se održe 07.05.2022. godine.

Predsjednica Vijeća roditelja gđa Brkić je predstavnike prvih razreda detaljnije upoznala sa ovim projektom, te predložila da na današnjoj sjednici, u skladu sa ranijom praksom, bude izabrana komisija ispred Vijeća roditelja koja bi na taj dan objedinila i prebrojala prikupljeni novac. U sastav komisije bi ušao po jedan predstavnik svakog razreda, te predsjednica Vijeća roditelja po službenoj dužnosti. Na poziv da se daju prijedlozi za članove komisije dobrovoljno su se javili predstavnici nekoliko odjeljenja, te je jednoglasno izabrana komisija u sastavu:

1. Snježana Brkić, predsjednica Vijeća roditelja
2. Muhamed Cimirotić, predstavnik I-1
3. Mirza Terzo, predstavnik II-6
4. Alzira Hota, predstavnica III-5 i
5. Sabina Šunjić, predstavnica IV-3.

Predsjednica je zamolila i predstavnika II-5 razreda gospodina Izeta Turkovića, koji se takođe dobrovoljno prijavio, da se pridruži Komisiji i da taj dan pomogne oko organizacije i rada Komisije, što je gospodin Turković i prihvatio.

Ad/9

V. d. direktorice Škole gđa Amra Čolić informisala je o aktivnostima koje su provedene na realizaciji ekskurzije u ovoj školskoj godini. Obzirom na Instrukciju Ministarstva za odgoj i obrazovanje prema kojoj je naloženo obustavljanje priprema za ekskurzije, gđa Čolić je istakla da je Škola obavezna postupati po instrukcijama Ministarstva.

Nakon diskusije koja je uslijedila i u kojoj su učestvovali gđin Zeba, gđin Obućina, gđin Turković, gđin Hubanić i gđa Hota, jednoglasno je donesen Zaključak da se uputi inicijativa ispred Vijeća roditelja preko Vijeća roditelja osnovnih i srednjih škola Kantona Sarajevo (VROŠŠ KS) da se ponovo razmotre mjere i Instrukcija Ministarstva po pitanju organizovanja ekskurzija. Također je dogovoreno da predstavnici roditelja maturanata dostave stav svojih odjeljenja u pogledu organizovanja maturantske ekskurzije.

Ad/10

Predsjednica gđa Brkić upoznala je predstavnike Vijeća roditelja sa aktivnostima Koordinacije Novo Sarajevo VROŠŠ KS.

Zaključeno je da će predsjednica informacije iz Ministarstva prosljeđivati članovima Vijeća roditelja onda kada ih zvanično dobije od Škole, a ostale informacije od VROSS KS prosljeđivaće odmah po dobivanju istih, u cilju kontinuiranog informisanja roditelja o aktivnostima od interesa.

Ad/11

Predsjednica je u cilju unapređenja radne klime u Školi i kreiranja prijatnog školskog ambijenta pozvala roditelje da daju svoje prijedloge. U tu svrhu je predložila da se u narednom periodu održi jedna online tematska sjednica na kojoj bi se razmotrile inicijative i ideje za unapređenje uslova za rad i obrazovanje učenika u Školi. Prijedlog je jednoglasno prihvaćen.

Ad/12


Pod tačkom Tekuća pitanja/Razno, gđa Dedović je informisala o osiguranju učenika i pravu na zdravstveno osiguranje. V.d. direktorice gđa Čolić je također informisala Vijeće roditelja da je Škola, u cilju skraćivanja i olakšavanja ove procedure za učenike, roditelje i Školu, sastavila spiskove učenika i dostavila ih Zavodu.

Gđa Basarić je predložila da se putem sistema EMIS-a dostavljaju podaci Zavodu zdravstvenog osiguranja o učenicima koji pohađaju Treću gimnaziju, kako bi se olakšala procedura koja trenutno zahtijeva pojedinačno dostavljanje potvrda o redovnom školovanju na početku školske godine Zavodu zdravstvenog osiguranja.

Ovu inicijativu su podržali svi roditelji, te je donesen Zaključak da se također i ova inicijativa uputi ispred Vijeća roditelja prema VROSS KS.


Treća sjednica Vijeća roditelja završena je u 19:30 sati.

Zapisnik Treće sjednice sastavila:
Aida Imamović, sekretar VR



Zapisnik ovjerila:

Snježana Brkić, predsjednica VR



ZAPISNIK
SA DRUGE SJEDNICE VIJEĆA RODITELJA JU TREĆE GIMNAZIJE
U ŠKOLSKOJ 2021/22. GODINI

Druga sjednica Vijeća roditelja održana je u utorak, 23.11.2021. godine s početkom u 18.00 sati u amfiteatru Škole. Sjednica je održana uz poštivanje propisanih svih zdravstveno - epidemioloških mjera.

Na početku sjednice konstatovano je da sjednici prisustvuje 17 članova Vijeća roditelja Treće gimnazije, da su 4 člana, predstavnici I-4, II-3, II-4, II-6 i IV-6 najavili odsustvo sa sjednice zbog nemogućnosti prisustvovanja istoj, a za I-2 razred sjednici je prisustvovao zamjenik člana, gosp. Nedžad Sudić. Predstavnik IV-5 razreda gđa Velma Rebić nije prisustvovala sjednici, a informacija o odsustvu sa sjednice do početka iste nije dostavljena. Nakon početka sjednice, istoj se pridružila i predstavnik IV-2 razreda, gđa Ljubijankić, tako da je ukupan broj prisutnih članova na početku Druge sjednice Vijeća roditelja bio 18. Predstavnik II-4 razreda, gosp. Kenan Čaklović, koji je prethodno najavio kašnjenje iz objektivnih razloga, pridružio se sjednici tokom diskusije u okviru tačke 2. dnevnog reda, te je ukupan broj prisutnih roditelja na sjednici bio 19 od 24.

Predsjednica Vijeća roditelja, gđa Snježana Brkić, konstatovala da je zadovoljen kvorum za odlučivanje.

Sjednici su pored predstavnika roditelja prisustvovala direktorica Škole, gđa Senada Salihović i pedagog gđa Hasija Dedović.

Predsjednica je otvorila Drugu sjednicu Vijeća roditelja, te predložila izmjenu prijedloga Dnevnog reda Druge sjednice koji je uz poziv dostavljen svim članovima, kao što slijedi:

- Izostaviti predloženu tačku 3. Dnevnog reda, a koja se odnosi na informaciju o primopredaji arhive Vijeća roditelja, budući da zbog opravdane odsutnosti jednog člana komisije, primopredaja nije mogla biti izvršena uoči sjednice kao što je planirano.
- Dopuniti dnevni red inicijativom predstavnika I-6 razreda, gosp. Hasana Pleha, u vezi sa osvjetljenjem spoljnih prostora/dvorišta Škole, o čemu će u nastavku sjednice informaciju dati direktorica Škole, gđa Salihović.

Predstavnik III-5 odjeljenja je predložila da se na zahtjev roditelja odjeljenja koje predstavlja, u dnevni red Druge sjednice uvrsti problematika vezana za predmet Fizika i problematika vezana za vršnjačko nasilje (inicijativa da se problematika vršnjačkog nasilja kroz prikladan model prezentira učenicima, te isti upoznaju sa svojom odgovornošću prema zakonima koji regulišu ovu oblast).

Predstavnik II-1 je inicirala dobivanje informacija o načinu pravdanja izostanaka zbog kašnjenja na prvi čas djece koja stanuju na udaljenim lokacijama i koriste gradski prevoz.

Prijedlozi predstavnika III-5 i II-1 su prihvaćeni i o istim će se diskutovati pod tačkom Tekuća pitanja.

Izmijenjeni Dnevni red druge sjednice Vijeća roditelja jednoglasno je usvojen (sa 18 glasova ZA), kao što slijedi:

Dnevni red

1. Usvajanje Zapisnika sa Prve redovne sjednice Vijeća roditelja JU Treća gimnazija, održane 20.10.2021. godine
2. Analiza uspjeha u učenju i vladanju na kraju I klasifikacionog perioda
3. Razmatranje i usvajanje Plana i programa rada Vijeća roditelja za tekuću školsku godinu
4. Izbor dva predstavnika Vijeća roditelja u ocjenjivački žiri za Decembarske dane kulture
5. Upoznavanje sa aktivnostima Koordinacije Novo Sarajevo VROSS Kantona Sarajevo
6. Osvjetljavanje spoljnih prostora/dvorišta Škole
7. Edukativno predavanje za roditelje u saradnji sa Udruženjem za zdrav psihofizički razvoj SANUS
8. Tekuća pitanja / Razno

Ad/1

U okviru ove tačke predstavnica III-6 razreda, gđa Basarić, iznijela je primjedbnu na dio Zapisnika sa Prve sjednice VR koji se odnosi na broj prisutnih – broj prisutnih trebalo je da bude za jedan manji od navedenog, budući da omaškom nije konstatovano da je gđa Basarić opravdano odsutna. Predsjednica Vijeća roditelja je predložila korekciju zapisnika u skladu sa ovom primjedbom, te je zapisnik sa predloženom korekcijom, sa 18 glasova ZA, jednoglasno usvojen.

Ad/2

Pedagog škole, gđa Hasija Dedović je upoznala članove Vijeća roditelja sa uspjehom u učenju i vladanju na kraju I klasifikacionog perioda.

Informisala je da školu pohađa 573 učenika, 243 mladića i 330 djevojaka. Sredinom prvog polugodišta na sjednicama Odjelenskog vijeća je utvrđeno da je frekvencija ocjenjivanja zadovoljavajuća i da samo kod nekih učenika koji su bili COVID pozitivni ili su izostajali zbog neke druge bolesti nedostaju ocjene iz pojedinih predmeta. U periodu od 01.09.2021. do 02.11.2021. godine 43 učenika su bila pozitivna na COVID-19.

Od 573 učenika, 566 ima primjerno vladanje, 6 učenika vrlo dobro vladanje i jedan učenik dobro vladanje zbog neopravdanih izostanaka.

Učenici su napravili 3.578 opravdanih i 122 neopravdana izostanka, ukupno 3.700 izostanaka.

Predstavnica III-6 razreda, gđa Basarić je predložila da se Izvještaj o učenju i vladanju u narednom periodu dostavlja uz ostale materijale za sjednicu Vijeća roditelja.

Predstavnik III-2 razreda, gđin Zeba je u pogledu informacije o broju izostanaka zatražio dodatnu informaciju da li su isti na nivou izostanaka u ostalim školama. Direktorica gđa Salihović je pojasnila da izostanke treba posmatrati obzirom na trenutnu situaciju, uzrokovanu COVID-19 i iznijela informaciju da su izostanci Škole u proteklom periodu uvijek bili ispod prosjeka izostanaka u ostalim srednjim školama.

Ad/3

U okviru ove tačke Dnevnog reda predsjednica Vijeća roditelja je informisala prisutne da se Plan i program rada sačinjava na osnovu realno izvodivih aktivnosti, što ne znači da se druge

aktivnosti i inicijative koje se nisu mogle predvidjeti, ne mogu realizovati na osnovu naknadne odluke Vijeća roditelja.

Prijedloga za izmjenu i dopunu Plana i i programa rada Vijeća roditelja za tekuću školsku godinu nije bilo, te je isti jednoglasno, sa 19 glasova ZA, usvojen.

Ad/4

U okviru ove tačke dnevnog reda, predsjednica Vijeća roditelja je informisala prisutne o potrebi izbora dva predstavnika Vijeća roditelja u ocjenjivački žiri za Decembarske dane kulture.

Pedagog, gđa Dedović je upoznala prisutne o održavanju Decembarskih dana kulture, koji će se ove godine zbog epidemiološke situacije održati 02. 12.2021. godine (II i IV razredi) i 03.12.2021. godine (I i III razredi), u različitim terminima: I razredi u 10 sati, II razredi u 16 sati, III razredi u 11 sati i IV razredi u 17 sati.

U ocjenjivački žiri ispred Vijeća roditelja jednoglasno, sa 19 glasova ZA izabrani su predstavnici roditelja koji su se dobrovoljno javili za tu aktivnost:

- gđa Sabina Šunjić, predstavnik IV-3 razreda za učešće u ocjenjivačkom žiriju za I i III razrede, i
- gosp. Nedžad Sudić, zamjenik predstavnika I-2 razreda za učešće u ocjenjivačkom žiriju za II i IV razrede.

Ad/5

Predsjednica Vijeća roditelja je informisala prisutne članove Vijeća roditelja o održanoj konstituirajućoj sjednici Koordinacije Novo Sarajevo VROŠŠ Kantona Sarajevo.

Na sjednici je najprije konstituirana Koordinacija koju čine predsjednici vijeća roditelja svih osnovnih i srednjih škola na teritoriji opštine Novo Sarajevo, te izabrano rukovodstvo Koordinacije. U nastavku sjednice je usvojen Poslovnik o radu Koordinacije, pri čemu je gđa Brkić stavila prigovor na način predlaganja Poslovnika o radu Koordinacije - predlagač je unaprijed dostavio prijedlog Poslovnika, te zatim na samoj sjednici dodatno predložio dvije važne izmjene koje se tiču članstva u Koordinaciji a da o tome nije prethodno upoznao članove Koordinacije da bi se pripremili za diskusiju. Na sjednici je takođe diskutovano o problematici vezanoj za elektronske dnevnike. Postoji problem za roditelje sa troje i više djece, budući da mogu dobiti samo dvije šifre, što im omogućava pristup e-dnevniku samo za dvoje djece. Takođe je istaknut problem nemogućnosti pristupa e-dnevniku za srednjoškolce. Dogovoreno je da se na ove probleme skrene pažnja na predstojećem sastanku sa predstavnicima nadležnog ministarstva i zatraži hitno rješavanje. Na sjednici je razgovarano i o problemima koji su se u pojedinim školama pojavili u vezi sa izborom predstavnika roditelja u školski odbor.

Ad/6

Direktorica gđa Salihović je po inicijativi gosp. Pleha za osvjetljavanje školskog dvorišta informisala da je postojao kratkotrajni problem sa osvjetljenjem u dvorištu Škole koji je odmah otklonjen, te da su u dvorištu u međuvremenu postavljena još 4 reflektora kako bi se prostor ispred i iza Škole u što većoj mjeri osvijetlio. Sugerisala je da se sve inicijative i sugestije roditelja za unapređenje uslova u kojima se odvija nastava u Školi, u cilju bržeg i efikasnijeg rješavanja problema, mogu dostaviti direktno na e-mail direktorici Škole, te da nije neophodno da one idu preko Vijeća roditelja.

Ad/7

Edukativno predavanje za roditelje održao je profesor Rusmir Baljić ispred Udruženja za zdrav psihofizički razvoj SANUS, na temu „Prevencija ovisnosti među mladima“. Prisutni su informisani da 75% djece ovisnika potiče iz porodica koje uživaju određene opijate. Evidentirano je da se veliki broj djece testira na zarazne bolesti (HIV, hepatitis), te da veliki broj djece konzumira lake droge. Istakao je da u okviru Klinike za infektivne bolesti djeluje Savjetovalište koje djeci i roditeljima može pružiti adekvatnu pomoć.

U okviru ove tačke dnevnog reda je nakon predavanja vođena diskusija u kojoj je učestvovao veći broj roditelja – između ostalih, predstavnik I-6 odjeljenja gosp. Hasan Pleh koji se osvrnuo na pravni aspekt problema, odnosno krivičnu odgovornost uživalaca droge čak i kad su u pitanju maloljetnici, predstavnik II-5 odjeljenja gosp. Izet Turković koji je izrazio svoje nezadovoljstvo nepostojanjem sistemskog rješenja, predstavnica I-3 odjeljenja gđa Snježana Brkić i dr.). Istaknuta je potreba sistemskog rješavanja ovog problema i otkrivanja ovisnosti po raznim osnovama u ranoj fazi.

Ad/8

Gđa Alzira Hota je informisala prisutne o problemu koji odjeljenje III-5 ima sa predmetom Fizika i predmetnim profesorom Maličevićem. Istakla je da je i u ranijem periodu evidentiran problem sa istim profesorom u vezi kriterija ocjenjivanja, te da je zahvaljujući zajedničkom sastanku roditelja sa profesorom problem bio riješen. Budući da se problem ponovo aktuelizirao, roditelji odjeljenja su zatražili da se s tim upozna i Vijeće roditelja. Nakon izlaganja predstavnice III-5 odjeljenja i direktorice gđe Salihović, Vijeće roditelja je zaključilo sljedeće: Obzirom da Vijeće roditelja prije sjednice nije dobilo precizne informacije o problemu, te da roditelji III-5 nisu najprije ostvarili svoje pravo pojedinačnog sastanka sa predmetnim profesorom u skladu sa Protokolom o saradnji i komunikaciji roditelja sa Školom, savjetovano je roditeljima da najprije iskoriste to pravo. Ukoliko nakon pojedinačnih sastanaka problem ne bude riješen, roditelji III-5 treba da upute kolektivni dopis Upravi o potrebi zajedničkog sastanka sa predmetnim profesorom i o tome informišu i Vijeće roditelja.


- U pogledu prijedloga vezanog za problematiku vršnjačkog nasilja, pedagog, gđa Dedović je informisala prisutne da se kontinuirano provodi Plan za prevenciju vršnjačkog nasilja u okviru nastave, ali da bi svakako bilo korisno upoznati kako učenike, tako i profesore o zakonskim odredbama kojima je regulisana odgovornost po ovom pitanju.

- U pogledu načina pravdanja odsustva sa nastave vezanog za kašnjenja na prvi čas zbog gradskog prevoza, a prema pitanju koje je postavila predstavnica II-1 razreda, gđa Mirsada Maglajlija, direktorica gđa Salihović je informisala prisutne da su razrednici upoznati koja djeca koriste gradski prevoz i povremeno imaju probleme sa kašnjenjem, te da se takva povremena izostajanja pravdaju. Ukoliko je kašnjenje učestalo i ponavlja se, kako u prvoj, tako i u drugoj smjeni, onda je takvo postupanje nedopušteno, te se za odsustvo mora zatražiti pravdanje roditelja.

Druge sjednica Vijeća roditelja završena je u 19:50 sati.


Zapisnik Druge sjednice sastavila:

Aida Imamović, sekretar VR



Zapisnik ovjerila:

Snježana Brkić, predsjednica VR



ZAPISNIK S PRVE SJEDNICE VIJEĆA RODITELJA JU TREĆE GIMNAZIJE U ŠKOLSKOJ 2021/22. GODINI

Prva sjednica Vijeća roditelja održana je u srijedu, 20.10.2021. godine s početkom u 17.30 sati u školskom amfiteatru. Sjednica je održana uz poštivanje propisanih zdravstveno-epidemioloških mjera u cilju zaštite od bolesti COVID-19.

Uvidom u spisak prisutnih roditelja konstatovano je da sastanku prisustvuju 23 člana Vijeća roditelja Treće gimnazije, direktorica gđa. Senada Salihović, zamjenica direktorice gđa. Amra Čolić, pedagog gđa. Hasija Dedović, psiholog gđa. Merima Pašalić i predstavnica roditelja u Školskom odboru gđa. Nada Sokolović.

Prvoj sjednici Vijeća roditelja nije prisustvovao 1 član, predstavnik IV-6 - g. Armin Zeba koji je prethodno najavio odsustvo.

Broj prisutnih članova zadovoljava kvorum za odlučivanje.

Sastanak je otvorila direktorica škole pozdravljanjem roditelja kojima je zaželjela uspješan rad i kvalitetnu saradnju u školskoj 2021/22. godini.

Predložen je sljedeći dnevni red, koji je članovima Vijeća roditelja prethodno dostavljen e-mailom:

1. Konstituiranje Vijeća roditelja JU Treća gimnazija za školsku 2021/2022. godinu, prema čl. 6 Poslovnika o radu Vijeća roditelja JU Treća gimnazija (gđa. Senada Salihović, direktorica)
2. Upoznavanje sa Poslovníkom o radu Vijeća roditelja JU Treća gimnazija (gđa. Hasija Dedović, pedagog)
3. Izbor rukovodstva Vijeća roditelja u školskoj 2021/2022. godini, prema članu 9. Poslovnika o radu Vijeća roditelja JU Treća gimnazija i primopredaja dužnosti
4. Formiranje komisije za primopredaju dužnosti i primopredaja dokumentacije Vijeća roditelja
5. Izvještaj o radu Vijeća roditelja za školsku 2020/2021. godinu (g. Kenan Čaklovića zamjenik predsjednika Vijeća roditelja u šk. 2020/21. god.)
6. Upoznavanje članom u Školskom odboru iz reda roditelja (gđa. Nada Sokolović)
7. Izvještaj o radu člana Školskog odbora iz reda roditelja (gđa. Nada Sokolović)
8. Izvještaj o rezultatima uspjeha učenika u učenju i vladanju u školskoj 2020/2021. godini (gđa. Amra Čolić, zamjenica direktorice)
9. Izvještaj o vannastavnim aktivnostima u toku šk. 2020/2021. godini (gđa. Hasija Dedović, pedagog)
10. Razno

- Zajedničko fotografiranje Vijeća roditelja za web stranicu i „Godišnjak“

Predloženi dnevni red je jednoglasno usvojen. Nije bilo dopuna dnevnog reda.

Ad/1

Sjednicu je otvorila direktorica, gđa. Senada Salihović i zaželjela uspješan rad predstavnicima roditelja u Vijeću roditelja Treće gimnazije. Direktorica je prozvala prisutne roditelje koji su odabrani da u ime svojih odjeljenja budu predstavnici u Vijeću roditelja Treće gimnazije u tekućoj školskoj godini. Nakon toga je ustanovljeno da su ispunjeni uvjeti za konstituiranje Vijeća roditelja za školsku 2021/22. godinu, prema čl. 6 Poslovnika o radu Vijeća roditelja Treće gimnazije.

Ad/2

Pedagog gđa. Hasija Dedović je upoznala prisutne s postojećim Poslovníkom o radu Vijeća roditelja JU Treća gimnazija, koji je direktorica prosljedila putem e-maila svim članovima Vijeća uz poziv na ovu sjednicu. Pedagog je napomenula da je kao tačka dnevnog reda navedeno - Upoznavanje s Poslovníkom, a da će se tačka - Usvajanje Poslovnika ostaviti za narednu sjednicu.

Za riječ se javio g. Pleh koji je prisutnima skrenuo pažnju da ovaj Poslovník treba uskladiti sa Zakonom o srednjem obrazovanju, da ima određene manjkavosti, te da je neophodno dokument doraditi i korigirati.

Zatim se za riječ javila gđa. Alzira Hota i istakla da ne smatra da je cijeli Poslovník „nezakonit“, jer se po njemu radilo i prethodne godine. Slaže se s tim da ima prostora za unapređenje, te da će rado dati svoj doprinos izradi novog Poslovnika.

Gđa. Snježana Brkić se obratila prisutnima i pojasnila da za ovaj Poslovník, obzirom na izmjene i dopune Zakona o srednjem obrazovanju, postoji potreba da se doradi i korigira. Uz to je spomenula da Protokol saradnje i komunikacije roditelja i škole, koji je direktorica dostavila uz poziv, vjerovatno potrebno izmjeniti i doraditi, obzirom na izmjene u Zakonu u srednjem obrazovanju i novi Poslovník koji će donijeti Vijeće roditelja.

Ona je predložila da se imenuje jedna komisija koja bi radila na izmjenama i dopunama Poslovnika o radu Vijeća roditelja i Protokola saradnje i komunikacije roditelja i škole. Pozvani su roditelji da se prijave za rad u ovoj komisiji, te su se prijavili: gđa. Alzira Hota, gđa. Snježana Brkić i g. Hasan Pleh. Svi članovi Vijeća su jednoglasno prihvatili ovaj prijedlog.

Ad/3

Direktorica Škole, gđa. Senada Salihović, pozvala je prisutne da iznesu svoje prijedloge za imenovanje rukovodstva Vijeća roditelja za školsku 2021/22. godinu. Podsjetila je da rukovodstvo čine: predsjednik Vijeća, zamjenik predsjednika i sekretar.

Predstavnik III-1 - g. Nusret Mujezinović je predložio g. Kenana Čakloviću koji je prošle godine bio zamjenik predsjednika, te da bi on ove godine bio njegov prijedlog za predsjednika Vijeća roditelja. G. Čaklović je zahvalio na prijedlogu i izjasnio se da ne bi prihvatio prijedlog, jer smatra da svake godine treba mijenjati rukovodstvo, kako bi se svima dale nove prilike. Naglasio je da će kao i do sada aktivno sudjelovati i pomagati rad Vijeća roditelja u svakom slučaju.

G. Kenan Čaklović je zatim predložio gđu. Snježanu Brkić kao predsjednicu za ovu školsku godinu. Za riječ su se zatim javili g. Murčo Obućina i g. Mirza Terzo koji su ovaj prijedlog podržali i naglasili kako su oni imali odličnu saradnju u prethodnim sazivima Vijeća roditelja kada je gđa. Brkić bila predsjednica.

Obzirom da nije bilo novih prijedloga direktorica je pozvala prisutne da glasaju.

Jednoglasnom odlukom svih prisutnih odabrana je gđa. Snježana Brkić za predsjednicu Vijeća roditelja u ovoj školskoj godini, na čemu se iskreno zahvalila svim prisutnim roditeljima.

Zatim je gđa. Brkić pozvala roditelje da se prijave za zamjenika predsjednika ili da daju neke prijedloge. Javila se gđa. Alzira Hota i predložila g. Murču Obućinu za zamjenika predsjednika. Pošto nije bilo drugih prijedloga, jednoglasnom odlukom odabran je g. Murčo Obućina kao zamjenik predsjednika ovogodišnjeg Vijeća roditelja.

Direktorica je, zatim, zamolila gđu. Aidu Imamović da, ako može i želi da nastavi biti sekretar i ove školske godine. Gđa. Imamović je prihvatila, a Vijeće roditelja podržalo jednoglasno.

Ad/4

Pedagog se obratila prisutnima vezano za Komisiju za primopredaju dužnosti, koju će činiti predstavnici rukovodstva prošlogodišnjeg saziva Vijeća roditelja i novoodabrano rukovodstvo. Pedagog je napomenula da se kompletna dokumentacija Vijeća roditelja iz prethodnih školskih godina nalazi se u školskoj arhivi kod pedagoga. Do sljedeće sjednice pedagog će pripremiti Zapisnik o primopredaji dokumentacije koji će, nakon što se izvrši uvid u navedene dokumente, prisutni članovi i potpisati.

Ad/5

Zamjenik predsjednice Vijeća roditelja u školskoj 2020/21. godini, g. Kenan Čaklovića, podnio je Izvještaj o radu Vijeća roditelja za školsku 2020/21. godinu. Izvještaj se nalazi u prilogu ovog zapisnika.

Ad/6 i Ad/7

Predstavnica roditelja u Školskom odboru, gđa. Nada Sokolović, se predstavila prisutnima i najavila svoje redovno prisustvo sjednicama Vijeća roditelja, te pozvala roditelje na delegiranje pitanja prema Školskom odboru. Gđa. Sokolović je prezentirala Izvještaj o radu člana Školskog odbora iz reda roditelja u prošloj školskoj godini koji se nalazi u prilogu ovog zapisnika.

Ad/8

Zamjenica direktorice, gđa. Amra Čolić, upoznala je Vijeće roditelja s Izvještajem o rezultatima učenika u učenju, vladanju i izostancima u školskoj 2020/21. godini. Ona je istakla da možemo biti zadovoljni rezultatima u učenju i vladanju naših učenika, da je broj izostanaka smanjen u odnosu na godinu prije, a razlog manjeg broja izostanaka je online model nastave koji je bio zastupljen prošle školske godine. Cjelokupni izvještaj nalazi se u prilogu ovog zapisnika.

Ad/9

Pedagog Škole, gđa. Hasića Dedović, upoznala je Vijeće roditelja s Izvještajem o realizaciji vannastavnih aktivnosti, projekata i drugih oblika odgojno-obrazovnog rada u školskoj 2020/21. godini. Ona je izdvojila najznačajnije školske projekte i slobodne aktivnosti učenika, te istakla važnost uloge škole u kreiranju slobodnog vremena učenika, te saradnju učenika, roditelja i nastavnika u zajedničkim odgojno-obrazovnim aktivnostima. Iako se nastava odvijala većinom po online modelu, uspjeli su se realizirati predviđeni sadržaji, a s povratkom učenika u škole od aprila do juna 2021. god. uspješno su nadoknađeni određeni planirani sadržaji. Cjelokupni izvještaj se nalazi u prilogu zapisnika.

Zatim se direktorica obratila roditeljima s ciljem informiranja roditelja o nastavku započetih projekata i uvođenjem nekih novih u ovoj školskoj godini. Spomenula je Centar izvrsnosti i

liderstva, Govorništvo, Edukaciju iz pružanja prve pomoći povrijeđenima u saradnji sa Crvenim križem, Alumni Treće gimnazije, Savjetodavni odbor Treće gimnazije i sl.

Psiholog, gđa. Merima Pašalić se obratila roditeljima u namjeri da skrene pažnju na posljedice pandemije i online nastave na mentalno zdravlje učenika, te istakla da je važno da učenici i roditelji prepoznaju probleme i poteškoće kod svoje djece koje se tiču mentalnog zdravlja, te pozvala roditelje na saradnju i pružanje razumijevanja za svoju djecu i da se također slobodno obrate stručnim osobama, koje mogu dati adekvatnu podršku i uputu za postupanje.

Ona je dala kraći osvrt na to da je s početkom ove školske godine primjetan porast broja učenika koji se javljaju u pedagoško-psihološku službu škole s željom da riješe različite probleme s kojim se suočavaju, te da su tipični problemi učenika vezani za depresivnost, anksioznost, nedostatak motivacije za učenjem, porodične probleme i sl. kojima je sigurno jednim dijelom uzrok izolacija, distanca, neizvjesnost i nesigurnost uvjetovana pojavom pandemije bolesti COVID-19.

Ad/10

Prije početka sjednice izvršeno je zajedničko fotografiranje ovogodišnjeg saziva Vijeća roditelja, kako bi se fotografije koristile za sadržaj „Godišnjaka“ i objavile na web stranici škole.

Na kraju sjednice prisutnima se ponovo obratila predsjednica Vijeća roditelja, gđa. Snježana Brkić i ukazala roditeljima na važnost komunikacije i razmjene informacija sa sjednica Vijeća svim roditeljima odjeljenja i obratno. Predsjednica je zamolila roditelje da formiraju viber grupu i mailing listu putem koje će se obezbijediti komunikacija između predstavnika u Vijeću i ostalih roditelja iz odjeljenja. Također je pozvala članove Vijeća roditelja na korektnu saradnju i podršku radu škole.

Prva sjednica Vijeća roditelja završena je u 19.05 sati.

Zapisnik Prve sjednice sastavila Hasija Dedović, pedagog

Hasija Dedović

Zapisnik ovjerila gđa. Snježana Brkić, predsjednica Vijeća roditelja

Snježana Brkić